

بالنسبة لشوية النصائح الحياتية :

--

- اقعد مع نفسك و انسي كل الدنيا اللي حواليك و هات ورقة و قلم و حط اهدافك في الحياة مهما كانت كبيرة و صعبة و تبان مستحيل ليك و اكتبها .. و ابدأ دور علي الماتريال الخاصة بيها .. و ادرسها بشكل مكثف كانك في الجامعة .. اهم حاجة تحب المجال علشان ما تزهقش و تندمج و تشتغل و انت مبسوط و تحاول تطلع انصف شغل ممكن.

- اللعبة كلها انك بتشوف كذا سورس و معاها بتشوف كذا دماغ .. و اللي بيغطي حته هنا .. هتلاقي السورس الثاني جاييها و مغطي حاجة تانية .. فلما تجمعهم مع بعض و تتفرج عليها الي حد ما هتلاقي المعلومة مكتملة بنسبة كبيرة و هتستفاد لانك شوفت القطعة الناقصة + طريقة تفكير جديدة ممكن تعمل ميكس بينهم و تطلع بطريقة تفكير احسن منهم كلهم.

- خليك عملي اكثر .. ما تحرقش اكثر من شهر او اتنين في الدراسة .. اشتغل عالطول اول ما تحس انك ملم بالاسئلة اللي في دماغك .. الشغل دايمًا هو اللي بيكسبك الخبرة الحقيقية.

- الصدمات .. لما تقع كثير .. ممكن تصل لمرحلة انك امنت و صدقت انك عمرك ما هتنجح و دا فعلا حصلي .. اعرف ان باقي لك 1% و توصل .. انا قعدت اكثر من 3 سنين بدون نتيجة .. اول السنة الرابعة الحمد لله وصلت بعد ما صدقت اني استحالة اعملها و ان اللي نجحوا دول ناس خارقة للطبيعة .. و دا كله غلط.

- انا فاشل .. انا عمري ما هوصل .. انا عمري ما هقدر انجح .. انا اقل من الناس اللي موجودة .. انا مستحيل اوصل و احقق هدفي .. انا وقعت كثير!!!

اولا ربنا عمره ما هيظلمك "لا يكلف الله نفسا الا وسعها" .. و بناءا عليه اي مشكلة بتتخط فيها اعرف انها اختبار ليك و انت تقدر تعديه لان ببساطة ربنا مش هيديلك اختبار انت مش قده.

النقطة الثانية .. اوعي تنافس حد .. طول عمرك انت بتنافس نفسك .. لان قدراتك مختلفة عن قدرات غيرك .. لو انت ما وصلتش هتחס بالاحباط .. غير كمان لو انت كسبت هتوصل لمرحلة الغرور انك احسن واحد و هتبدا تكسل و هتنزل تحت .. انت بتنافس نفسك يعني انا النهاردة احسن من سنة فاتت و هكذا .. انت بتسابق نفسك و اكثر حد بيجهد و بيذل مجهود في مسابقته لنفسه مع الوقت بتلاقي نفسك سبقت ناس كثير لانك شديت حيلك اكثر.

النقطة الثالثة .. منحنى الهوكي .. دا عبارة عن ان الانسان بيفضل ياخذ في ضربات و ازمات لمدة كبيرة جدا .. و فجأة نجاحه يضرب في السماء و يعلي .. طب دا حظ ؟ .. لا طبعا هو اشتغل علي نفسك و اتعلم و ففضل ياخذ ضربات و عدل من الاخطاء لحد ما صحح منظومته و ضرب صح .. لان اي هدف في الدنيا عبارة عن سلسلة من الجدران .. لو قدرت تدمر كل جدار و حرقت خيار الاستسلام .. ساعتها هتوصل لاي هدف .. الاسد بيعيش علي 30% من محاولات الصيد .. يعني لو اصطاد 10 مرات .. بينجح في 3 بس .. و رغم ذلك مش بيباس .. بل بالعكس هو دايم بيغافر لآخر نفس علشان يظفر بفوزه.. و لو معملش كدة هو هيموت .. من الآخر معندوش رفاهية الاستسلام .. و حتي لو انت استسلمت .. هترجع بعدين و هتكمل بردك حتي لو حرقت سنين لانك لو ماكملتش هتقع و هتدمر نفسيا و هتחס انك دايم قليل و هتكتئب .. و افكر انك لو بتشتغل في مجال الناس بتقولك دا مستحيل تجيب منه .. اعرف ان اغني ناس في العالم هما 5% فقط .. لان هما دول اللي استحملوا المشاكل و الضغوطات و كثر الرفض لحد ما المنحني اتغير و ضربت الدنيا معاهم لفوق و بقوا امثلة يحتذي بيهم.

النقطة الرابعة .. السوبر مان في الدنيا هو اسرع واحد بياخد البوكس او الصدمات و يقوم في ساعتها ..جيف بيزوس مؤسس امازون .. مراته

اتطلقت منه و اخدت نص ثروته .. و مع ذالك كمل رغم انها ضربة عنيفة جدا .. لانك لو استسلمت انت الخسران.

- الطريق لقمة الجبل .. لما بيكون عندك هدف بتكون بالظبط زي اللي عايز يتسلق جبل و يقف عليه و يحقق حلمه .. لكن بمجرد ما تقع بتقول دي حاجة صعبة .. لو انت بتحبها اوي مهما تقع هتكمل و هتوصل.

النقطة الثانية لازم تمشي باستراتيجية كايزن او العادة الذرية .. يعني لو عندك هدف بتكون متحمس اوي انك توصله و بتشتغل اول يوم كثير و بعدها شعلة نشاطك بتقل لحد ما تنطفي .. العبرة مش انك توصل بسرعة .. العبرة دايما بالاستمرارية علشان توصل لاي هدف .. علشان كدة لازم تطبق كايزن .. الشيطان نفسه بيعملها معاك لانه عارف مفتاحك .. يعني انت عايز تخس .. يجي يقولك زود حنة بسيطة كمان .. انت جعان .. بياخدك بالتدريج خالص و بيصبر عليك لحد ما يوقعك .. فلو انت قولت لا من البداية علي الزيادة .. كنت هتخس.

كذلك في اي عادة عايز تعملها .. صغر العادة انها تبقي بحجم الذرة علشان يكون صعب علي نفسك انك تاجلها .. بتكره القراءة .. كل يوم اقرا سطر واحد ..حتي لو كلمة .. و استمر

- اللي بيخلي نجاح العادة دي اكيدة و عن تجربة شخصية في الشغل .. هي المكافأة اللي تزغل عينيك ايا ان كان نوعها .. جات عليا فترة كرهت الشغل .. بدات بساعة كل يوم و مكافأة 10 جنية .. اللي بيحصل بقي ان نفسك بتشتغل لصالحك و بتطمع .. يعني هتقولك ايه رايك ناخذ ساعتين شغل و نريح بكرة ..طب ايه رايك ناخذ ال 7 ساعات علي يومين وة نريح اسبوع .. طيب انا نفسي في ساعة ب 200 جنية مثلا .. نخلص ال 20 ساعة شغل دول في اسبوع و نجيب الساعة .. من الاخر العادة الذرية بتكبر و بيكون ليها تاثير كبير زي انفجار الذرة التي لا ترا بالعين المجردة و هتلاقي نفسك بتوصل بسرعة البرق بس لو بدات بساعة واحدة يوميا علي سبيل المثال.

- احذر الفخ .. انا وصلت ل 10 ساعات شغل . علشان حطيت مكافئات و كنت عايز اوصلها بسرعة و عايز اشتري المكافات لان نفسي فيها جدا .. و

بعدها وقعت لانني ما استحملتش و رجعت لنقطة الصفر .. استمر علي عدد الساعات بالميت 21 يوم و ما تكبرش عدد قبلها علشان تبقي اصبحت عادة عندك .. اول ما تلاقي نفسك تراجع او هتكسل .. صغر العادة ثاني .. يعني اشتغل ساعة او اقرا ساعة مثلا .. لمدة 21 يوم .. بعدها زود ساعتين .. و تستمر 21 يوم و هكذا .. لقيت نفسك مش هتقدر .. ارجع للساعة .. لو عايز تخس و بتاكل كمية معينة .. نقص 10% منها لمدة 21 يوم .. و هكذا تقدر تثبت العادة عندك و معدتك تصغر بالتدريج من غير ما تحس بحرمان .. لكن هتاكل رغيف واحد .. مش هتستمر لان دي مش عادة و كمان انت بتشيل فوق قدرتك فجاءة فتهلاقي نفسك وقعت!

اوعي تقول لنفسك انا كبرت او راحت عليا او انا لسا صغير .. في ست عندها 24 سنة و بقت مليارديرة .. و كنتاكي نفسه كان عنده 60 سنة لما بدا و بقت فروحه موجودة في كل حنة في العالم .. مفيش سن للنجاح .. وقت النجاح هو الوقت اللي بتقرر فيه انك هتبدأ.

كمان في البداية انت بتخط عندك عادة الشغل .. يعني انت بتكافئ نفسك علي الشغل و قدام لما تحس ان العادة عندك بقت زي الاكل و الشرب تبدأ تركز علي الانتاجية لانها بقت اساس راسخ جواك .. بكدة اي عادة او هدف عايز توصله باذن الله هتقدر توصله

اي مشكلة سواء في الشغل او شخصية عمرها ما هتكون كاملة .. لان لو المشكلة بقت كاملة يعني ملهاش حل .. و دا معناه ان اي مشكلة ليها ثغرة تقدر تقضي عليها .. لان اي حاجة من صنع البشر ناقصة و محتاجة للتطوير و التعديل للافضل لان ساعة الزمن بتغير كل حاجة و لازم نستمر علي التغيير و سرعة التأقلم معاها و الا لو مالحقتش السرعة بتاعة ساعة الزمن هتخس انك اتارت و هتبدأ تقع.

من الآخر لو نار الارادة عندك عالية و مستعد تحرق اي مشكلة و تحلها من جذورها اعرف انك باذن الله اكيد هتوصل.

الفشل هو انك تقرر الاستسلام و تقول انا مش قدها .. لكن التعثر هو انك تقوم و تقع و تحصلك شوية مشاكل اللي هي الجدران اللي بتقف في

وشك قبل ما توصل لهدفك .. و تتعلم من الوقوع دا لحد ما توصل للهدف
اللي انت عايزه .. لان الهدف عبارة عن سلسلة من لنجاحات الصغيرة
اللي بتوصلها و بتحفزك بعد ما بتكون اتعثرت كثير لحد ما توصل للهدف ..
يعني بتفوز بسلسلة المعارك الصغيرة لحد ما تربح الحرب كاملة.

اول ما تلاقي نفسك داخل علي منحني اختناق من الشغل و مش قادر
تستحمل .. احترم الحمل و احترم قدراتك و افصل عن الدنيا و ارتاح .. لان
احيانا بتكون فيه مشاكل اكبر مننا بتتحل لوحدها بمجرد ما تسببها لان
مفيش في ايديك حلول زي ازمة فايرس الكورونا .. و طبعا ما تحبببتش ..
الناس الثقيلة بيحصلها وقوع و ضربات و رغم ذلك بتفصل .. يعني مش
معني اني وقعت في الشغل انكد علي نفسي و ما اخرجش .. افصل
حياتك العملية علي الشخصية تماما طالما اشتغلت و عملت اللي عليك ..
لو جلدت نفسك هتقع و هتكتئب.

و اعرف دايم ان قيمة الانسان في ذاته و كل واحد فينا مخلوق ليه رسالة
معينة و كل واحد فيها طراز فريد يحد ذاته ليه مميزات و عيوب .. بالظبط
زي الجوهرة سواء اتحطت في الزبالة او غرقت في الطين او اتغلغت في
علبة .. بردو هتتباع بنفس القيمة .. لان قيمتها فيها .. اعرف ان ربنا نفخ
فيك من روحه و اعرف ان ربنا خلقلك الكون و المجرات و السماوات و انت
عايش ف جزء بسيط جدا من مجرة من ضمن المجرات .. ربنا خلقلك انت
كل الملك دا ليك .. لذلك انت غالي عنده و انت جزء منه .. و بناءا عليه
طالما انت جزء منه يبقى تقدر تعمل اي حاجة فعلا.

- اللي بيفرق الناس اللي شغالة عن اي مبتدئ .. انهم بيحطوا اهداف ..
مش بيحيدوا عنها او بيسيبيوها مهما حصل من مشاكل .. بالعكس .. من
الآخر معندهم مش اختيار اني اسيب هدفي .. و هما اكر ناس بقع علشان
كدة هما اكر ناس بتنجح .. اي هدف في الدنيا علشان توصله .. مسالة
وقت و صبر علشان توصله .. بتقع في مشاكل و وقوع و تعثرات .. بتشوف
هي حصلت ليه و ايه اسبابها و تحللها كويس .. و بتفضل تقع كثير .. لحد
ما المشاكل بتزهق منك و بتوصل لاول سلمة للنجاح .. و اول ما توصلها
صدقي هتندم في يوم من الايام انك فكرت لحظة انك تستلم من كتر
الفرحة و الفرغ اللي بتشوفه.

- حط لهدفك خطة كاملة و وقت زمني .. حتي لو هتحقق اقل منه ..
علشان الدنيا ما تكونش مش مرتبة عندك علشان لما توصل للاقل .. تعرف
السبب و توصل للاعلي.. لو محطتش وقت للوصول .. الدنيا هتكون عايمة
و مش محكومة و هتطول.

- ما تسمعش للخرفات و ما تسمعش لاي حد مهما كان ثقة .. خد كلامه
و جربه .. لان في ناس كتير هتلبسك في الحيط و هتقعد سنين معتقد ان
المعلومة صح لانه راجل بيغهم رغم لو طبقت العكس هتوصل .. و ممكن
تكون دماغه و تجربته مختلفة عنك فلازم تجرب .. و الدرس دا انا اتعلمه لما
عشت مخدوع اكثر من سنة اني ما اقدرش اعمل حساب فيس اعلاني
تاني لاني وثقت في الشخص الغلط .

- ما تحطتش الناس في مكانة اكبر من مكانتها .. حط الناس في حجمها
المضبوط .. في ناس هتعزها و هتفتكرها اخوات ليك .. و موقف واحد يقلب
لك الموازين تماما .. عامل الناس عادي جدا .. و ما تبكيش علي حد لان
محدث هيبكي عليك لما تقع الا انت .. من الاخر ما تعملش مكانة كبيرة
لحد .. اعمل المكانة دي لنفسك و بس مهما كانت فيه ناس افضل منك
في المجال .. تحط هدف اني هبقي احسن و افضل و ماليش دعوة بحد .

- اي حاجة بتفتكرها بتعكر مزاجك اقلها .. اقل بوابة الماضي اللي ممكن
ذكراتها تحرق منك كتير و خد منها العبرة و اقل .. و اقل بوابة
المستقبل علشان ما تحرقش من تفكيرك كتير خطط لقدام و اقل .. و
كمان اقل بوابة الحاضر و كل المشتتات اللي بتخليك ما تركزش علي
اللي انت بتعمله سواء شغل او حتي متعة .. زي الموبايل او السرحان او
ايا ان كان اللي بيخليك ما تركزش و ما تستمتعش باللحظة الحالية.

- فرق كويس اوي بين علاقات الشغل و علاقاتك الشخصية .. لان لو حد
افتكرته اخ و هيساعد و تيجي ساعة الجد يتخلي عندك هتنصدم بردو .. و
قدر اوي وقت وقوعك الناس الرجالة اللي وقفوا معاك و ساعدوك بقلب و
سندوك .. و اعرف دايم انهم السند وقت ما مكنش ليك لازمة و الدنيا

سوداء في وشك .. ربنا جعلهم طاقة النور اللي تفتح في وشك الدنيا ثاني .. الناس دي قليلن جدا لانه كله بيقدر وقته بالفلوس و من الاخر انا مش هصرف فلوسي عليك لاني انا اولي بيها .. فاللي يضحي بوقته اعرف انك غالبي عنده و اوعي تكون ناكر للجميل في يوم من الايام مهما عليت .

- المستحيل .. لما توصل لمرحلة انك راجل فاشل في حياتك باستمرار .. عمرك ما نجحت قبل كدة .. بطايرتك فرغت .. عايز تعيش عيشة و السلام .. الدنيا معاك مش فارقة .. كل دا بيكون نتيجة انك مستقل بقدرات نفسك .. و بتحطم روحك بروحك .. افكر انك انسان و ربنا سخر لك الدنيا بخيرتها كلها و عزك و رفع من مكانتك .. طول ما انت مستعين بالله اعرف ان المسحطيل دا هيكون مجرد كلمة هتمسحها باستيكة من حياتك لان ربنا بعزته و جباروته واقف في ظهرك .. ربنا خلقنا في الدنيا مش علشان ينسانا .. هو مسئول عنك سواء الناس اتخلت عنك او لا .. بس اول ما بتنساه بيقرص ودنك علشان ترجعه .. و خاف اوي لو كل حاجة بتجيك بسهولة .. اعرف ان ربنا مش راضي عنك و بيديك كل اللي نفسك فيه علشان يحاسبك في الآخرة .. من الاخر اتقي الله في حياتك و مالك .. و هتلاقي السعادة ملازماك .

- سر السعادة في الدنيا .. من المعروف انك لو عشت 100 سنة اكيد هتموت .. و بناء عليه هتتحدد حياتك الابدية كلها .. اذا كنت بتتقي الله و مخليه نصب عينيك و هو رقم 1 .. يبقى ان شاء الله هتدخل الجنة برحمته .. جنة لا فيها شقي و لا تعب .. و كل يوم بتزيد حلاوة عن اليوم اللي قبله .. يبقى ايه اللي يخليني ازعل او ابكي علي حاجة في الدنيا .. بيكون من الاخر انك تعيش الحياة الاولانية دي فرحان او مكتئب .. ايه اللي ما يخلينيش اعيش الحياتين بفرحة و سعادة .. حتي لو حد عزيز عليك مات .. بردو هتتقابلوا بعد كام سنة .. افرح و عيش الدنيا .. افرح لانك مصيرك حلو لو بتتقي الله .. عيش الحياة و افكر ان كفاية اوي انك راضي ربك و كمان سليم مش زي اللي نايم علي السرير 24 ساعة محبوس او مريض لا قدر الله .. ارضي بوضعك الحالي .. لكن اسعي دايم للاحسن .. اشقي و اتعب اوي في الشغل .. و كافئ نفسك و اخربها لما ترتاح .. هتحس انك تستحق الراحة .. اترك منطقة الراحة لانك مش مستمتع بيها .. هتحس ان ماللكش لازمة .. اشقي الكام ساعة اللي بتشتغلهم سواء نجحت او وقعت .. فاعرف ان النجاح مش دايم و الوقوع مش دايم .. ارتاح و انسي

اللي حصل في يومك .. و ارتاح .. و اعرف انك اول ما وقع كثير اوي .. اعرف انك قربت اوي للنجاح و لذلك لازم ترتاح و تفرح .

- حط ليك اهداف كبيرة "مهارات توصلك لهدف مالي" و ابدأ اقسام كل هدف لاهداف صغيرة اوي و حققها علشان تحس بالانجاز و النجاح .. كسر الجبل لطوب صغير .. و في نهاية كل يوم حط المشاكل اللي قابت لك و دور ليها علي حلول سواء بالبحث او سؤال الناس .. لو حصلت لك مشكلة عطلت يومك ما تقفلش اليوم و تستلم .. لا دور علي الحل لحد ما تلاقيه و ترجع بعدها للجدول المعتاد بتاعك .. حاول قبل ما تبدأ تحط المشاكل و بعدها اشتغل عادي .. و لما تخلص جدولك حاول تدور علي حلول ليها علشان ما تقفش بعد كدة .. يبقى انت اشتغلت و في نفس الوقت بتدور علي حلول لو لا قدر الله حصلت يبقى ان مامن نفسك .

- احسن ظنك بالله .. ما تحقرش من نفسك ربنا سخر لك الدنيا .. لما تشتغل ما تقولش انا هجرب و تقول انا مستحيل اوصل .. هتلاقيها قفلت في وشك .. ودا لان عقلنا بيشتغل بالطريقة التالية .. لو انا قولت انا اقدر .. دماغك بتبدأ تشتغل علي اساس الوضع دا و بتبدأ تبدع مليون سكة لحل المشاكل و الوصل لهدفك .. لما بتقول انا ما اقدرش .. دماغك بتبدأ توجد لك مليون سبب للفشل و الاستسلام و بتحبط نفسيا و ما بتقدرش فعلا .. الافكار اللي بتحطتها في دماغك و جوا نفسك بتكون عاملة زي المغناطيس لو حلوة بتلاقي نفسك اشتعلت طاقة و بتبدأ تحس انها زي اللعبة بتلعب و بتكسب دور و بتخسر دور و بتشوف انت خسرت ليه و في المحاولة الثانية بتكسب .. او بتفضل تقع لحد ما بتضطرب معاك .. كل ما صدقت انك تقدر تعملها بجد ان شاء الله هتعملها و هتلاقي معاك الدنيا احلي .. لما يبقى عندك هدف ما تفكرش كثير و تقول دا منطقي او لا .. نفذه علطول .. حتي لو معندكش الموهبة .. اغلب الناس اللي شغالة معندهم مواهب .. كانوا ناس عادية .. حطوا هدف .. قالوا هنقدر نعملها .. درسوا .. جربوا .. وقعوا .. قاموا كذا مرة و حلوا المشاكل .. نجحوا .. فقط لا غير .. الناجحين بيكون مجانيين الي حد ما لانهم بيعملوا حاجات غير منطقية و بتنجح .. مين كان يصدق ان الانسان يطلع علي سطح القمر .. دا جنون .. لكنه بقي شئ عادي .. لان فيه واحد صدق انه يقدر .. و هو بني ادم زيك علي فكرة مفيهوش حاجة مميزة خالص .. مش معني ان حد اصغر سنا منك و نجح اكثر منك يبقى انت مالكش لازمة .. اطلاقا .. مع

الشغل و المجهود ممكن تعديه ببساطة .. و اعرف انك لو عليت و مهما نزلت بردو بتكون عالي مش صفر زي زمان قبل ما تنجح و تحط رجلك علي اول سلمة .. اهم حاجة تطبق القاعدة و تستمر علي النجاح و تعلي لاكثر من مستوي .

- اغلط كتير اوي .. هتحس انك بتهبل و بتعك .. بس المفاجأة لما تلاقى واحد بيعمل نفس الطريقة و نجح .. هتقول ياه يا ريتني كنت عملتها دا انا كنت عارفها .. المشكلة انه هو جرب و انت لا .. علشان كدة هو وصل و انت لا .. عك براحتك عادي جدا علشان الغلط بيوصلك للنجاح مع الوقت + التحليل .

- ساعد نفسك ثم نفسك ثم نفسك ثم نفسك الاول .. محدش هيجري عليك لما تقع و محدش هينفعك و ما تتعششمش كتير في الناس اللي ساعدتهم لانهم بنسبة كبيرة هيتخلوا عنك و هينسوا اي مجهود اديتهلم .. فبلاش تستमित في مساعدة حد .. و ما تجريش ورا الشهرة .. بريقها لامع و جميل بس مزيف .. لان اول ما نجمك بينطفي و نورك بيروح و ما بتساعدتش .. هتلاقي الناس تركتك و هتلاقي اللي بيهاجمك حتي لو كان شخص مالوش لازمة اصلا .. و ما تسمعش لاي حد يكسر في مقاديفك .. ابعد عنه تماما و تجنبه .. و ابدأ يومك بالاستعانة بالله و كام فيديو تحفيز و هات قدامك حالات ناجحة في نفس مجالك .. كل يوم تبدأ يومك بالشكل دا علشات بطايرتك تتشحن و تقوم و تعاف و تشتغل .

- امتي تطلع المعلومة .. طلع المعلومة لما تكون جبت اخرها .. يعني بتربح منها كتير و اما تحس انها بدات تتحرق او بمعني اصح اربحها تقل و عندك حاجات تانية شغالة احسن من كدة .. تطلع المعلومة لحد بردو هيديك معلومة في نفس المستوي .. بعد ما تحترف الشغل جامد و تحس ان معاك كذا بير بترول شغالين .. مفيش مشكلة انك تساعد غيرك .. المساعدة مفيدة من ناحيتين .. اولاً لما تكون سبب في فتح باب رزق .. ثانياً لو انت مش مهتم و بتاع مصلحتك مفيش مشكلة ساعد اللي تتوسم فيه الخير و انه هيطور المعلومة و يشتغل و يرجع يحكي لك .. هتلاقيه ضاف ليك كتير و هتلاقيك استفدت و ممكن تعلم ناس تعديلهم بمراحل .. و دا حصل معايا شخصيا .. ببيان و انت بتشرح لهم ان كان مهتم و الحماس

بينط من عنيه و لا لآ .. ببيان ان كان بيحكى لك علي اللي حصل معاه و انه هيساعد و لا بيخبط بابك ساعة المصلحة بس .. انا بكرة نظرية المصلحة بس مع الاسف الدنيا ماشية كدة .. انا بساعدك النهاردة علشان ترجع لي بكرة .

- اللي داس عليك زمان .. لو كان من اهلك سامحه و اعرف انه عمل كدة لان حملك مش منطقي ليهم و انهم عايزين مصلحتك بس طريقتهم كانت غلط .. اما لو حد اعلي منك محبش يساعدك .. عندك حل من اتنين .. اول ما انت بتعلي هتتعرف و هتلاقي ناس بتجري عليك او عايزين منك مصلحة و هيكون هو واحد منهم .. اما انك تدوس عليه .. او اما انك تاخذ مصلحتك و تبقي علاقة مصالح و محطوط في الوضع المضبوط بتاعه و دا الاصح للبيزنس علشان البيزنس مفيهوش مشاعر .. و لو عايز يكون شريكك يكون بحدود .. ما تكبش اللي عندك كله .. تدي علي قد ما هو هيدليك و علي قدر المعلومة اذا كانت قديمة و محروقة و لا فعلا حاجة تستحق انك تدي معلومة ثقيلة .. هو دا تبادل الخبرات المضبوط .. خد و هات و نساعد بعض بحاجات فعلا شغالة و كويسة .. دا الشريك اللي تمسك فيه اللي يدك حاجة شغالة و يشغلك و انت كمان تديلة حاجة شغالة و تشغلك .. و اعرف ان المصلحة رقم 1 عند كل الناس .. فمتكونش اصيل الا مع الاصيل و اللي معدنه نضيف .. و دا هتعرفه مع الوقت و هيكون نادر اوي في حياتك.

- لو ناوي تاسس اسرة .. لازم تشتغل .. و تجيب فلوس كويسة تعيشك مرتاح مهما وقعت .. لازم تفكر في مراتك .. لازم تاخذ واحدة تبقي مهمة بدينك و علاقتك باسرتك .. و انك مهما بعدت عنهم هتفضل ترن علي دماغك علشان ترجع لهم .. اعرف ان دي بنت حلال و انها مش هتعصيك علي اهلك ابدا .. خدها تكون طموحة و عندها هدف و مليانة طاقة انها تشتغل و تبقي حاجة .. هي دي اللي هتملا بطايرتك لما تكون واقع و مدمر .. ما تخلفش قبل سنة و البس واقى .. و عيشوا حياتكم و استمتعوا .. و شوف في خلال السنة دي هل هتقدروا تكملوا مع بعض و هل بتعرفوا تتجاوزوا مشاكلكم مع بعض و لا مفيش بينكم توافق و الاستمرارية هتكون فيها مخاطرة لو خلفتوا .. سنة هتكون كفيلة جدا انها تبين معادنكم لبعض .. مين اللي بيمثل و مين اللي بني ادم بجد .. ما يغركش جو الحب و ان انت نفسك تحب و الكلام دا .. هتندم لو لبست في وحدة متسلطة او متحررة و ما بتحبش حد يامرها .. انا عن نفسي مش بهتم بالسن او

الشكل .. بهتم بالجوهر .. لان الجمال زائل .. المتبقي هي الروح اللي
بتخلي حياتك و بتحبك و بتعطف عليك .. من الاخر اللي بيكثر بكل كبيرة
و صغيرة في حياتك و بتكون انت محور حياته كلها .. لازم تفكر في اولادك
.. و ازاى من سن صغيرة تاسسهم انهم يكونوا احسن منك و دماغهم
توزن بلد .. و يبقوا السند لو حصلك حاجة .. تعلمهم تعليم كويس مش
تعليم حشو .. و تخلي عندهم ارادة من نار .. و تخلي دينهم رقم 1 في
حياتهم علشان ما يضلوش الطريق .. طول ما ربنا معاهم فهم في حمايته
و ترمي العيل في النار و ما يتخافش عليه مهما كانت الظروف .. ما تكروش
و تمد ايدك عليه .. نبطل شغل التعذيب احنا مش في جوانتنا موا .. بيحب
لعبه شيلها منه .. عنيف و مش بيتهد .. في حاجة اسمها تعديل سلوك ..
ما تكسرش ضناك في عز قوتك علشان ما يدمركش و يدوس عليك لما
يكون في عز قوته و شبابه و ما تلاقيش حد تسند عليه و تحس انك و لا
كانك خلفت .. دا فيديو بسيط اوي عن معني الضرب في اللغة العربية
علشان الناس اللي بتاخذ الدين حجة للتعذيب

<https://youtu.be/VucFkEgFIMc?t=87>

- رتب نفسك من برة في اوضتك و رتب نفسك من جوا في افكارك ..
هتتحس ان الامور بقت اسهل بكتير و هتتحس ان حياتك بقت افضل .

- لازم قبل سن ال 30 يكون عندك المشروع اللي يخليك ملك نفسك و
يكون بيصرف عليك مهما حصلك .. و لو عدت سن ال 30 مش مشكلة ..
مشروع كنتاكي بدا مع راجل عنده 60 سنة و دلوقتي المطعم ليه فروع
في كل محافظات مصر و في كل حطة في العالم كله .. بردو ما زالت تقدر
تبقي ناجح .. النجاح و السعادة مالهومش سن .. ان تاتي متأخرا خيرا من
الا تاتي .. لازم تكون مهين نفسك انك لو مت لا قدر الله .. انك ما تبقاش
رقم .. عشت حياتك .. حققت انجازات .. علشان لما تقابل ربنا بعملك
تبقي فرحان بيه و تحس ان ليك قيمة .

ازاي تبقي السعادة حياتك

<https://www.facebook.com/cairobestever/posts/946003095599453>

ازاي يبقي عندك ارادة

<https://www.facebook.com/cairobestever/posts/937988993067530>